

FESTA FEDERALA DA TIR A LUCERNA

Duas giadas argient per il Grischun

Sin la distanza 50 meters program B ha il team dal Grischun obtegnì il segund post. Sajettà ferm han er las junioras sin la distanza da 50 meters arma da caliber pitschen. Ellas turnan da Lucerna er cun ina medaglia d'argient. Restads sut las aspectativas èn ils tiradurs da 300 meters, cun na far nagin plaz da podest.

GION NUTEGN STGIER/FMR

La concorrenza dals chantuns tar la festa federala da tir a Lucerna è gia istorgia. Cun ambiziuns da cuntanscher plirs plazz da podest èn ils tiradurs e las tiraduras dal Grischun partids en direziun Svizra Centrala. L'emprim di dal tir n'han lura ils teams grischuns sajettà nunspegtadain betg uschè precis e n'han fatg naginas medaglias sin las distanzas da 300 meters, da 50 meters e pistola 25 meters.

In unic punct

Er il segund di n'han ils matscheurs grischuns da 300 meters betg persvas a Lucerna. Nagina medaglia per la delegaziun grischuna – bain ina pitschna terrada ed ina pulita dischillusiun. Disfortuna ha lura già la grupp che ha sajettà cun l'arma da standard en venter. In sulet punct ha mancà ad *Urs Brazerol*, *Meinrad Monsch* e *Michael Monsch* per far la medaglia da bronz. Pervia d'in protest davart ils Bernais han ils Grischuns già d'acceptar il quart post. Apparentamain n'haja la schiba electronica betg mussà ad ina tiradura dal chantun Berna in culp correct, uschia che quella ha dastgà sajettar in culp sup-



Argient per la grupp da pistola a Lucerna. (da san.) **Andreas Davatz**, schef matscheurs da pistola, **Elmar Fallet**, **Sybill Tscharner**, **Peter Strebel**, coach e **Roman Clavadetscher**.

plementar. Per il team grischun ina decisiun irraschunaivla. Las autras gruppas dal Grischun han bain obtegnì intgins posts da top ten, dentant en general sajettà resultats plitost manglus.

Ina giada dapli: Elmar Fallet

Sin la distanza da 50 meters pistola program B, qua ha l'equipa grischuna fatg la medaglia d'argient. Ina giada dapli è *Elmar Fallet*, il tiradur jauer, stà ina valur segira per il team grischun. Cumpletà il trio han *Roman Clavadetscher* e *Sybill Tscharner*. La grupp ha fatg la medaglia d'argient davos il team dal chantun Son Gagl e cun in avantatg da diesch puncts sin il team dal chantun Neuchâtel. Per la segunda medaglia d'argient per il Grischun èn stadas responsablas *Martina Herrli*, *Manuela Lorez* e *Selina Lötscher*. Las trais junioras han sajettà cun l'arma da caliber pitschen sin la distanza da 50 meters e turnan grazia a lur fermes resultats a chasa cun la medaglia d'argient. Davairas in vair success per las mattas grischunas ed er per la Federaziun grischuna dal sport da tir. Ils chantuns che han fatg las pli bieras medaglias èn: Turitg, Berna e Son Gagl.

FOTO BSV

MUSTÉR

Per finir fetg bunas notas

Tuttas emprendistas e tuts emprendists dalla Distec SA a Mustér han terminau cun success lur emprendissadis e quei per part cun fetg bunas notas. Alla fiasta da diplom han ils polimecanists saviu selegrar da prestaziuns alla testa dalla rangaziun dils emprendists. *Dominic Huonder* ha contonschiu la nota da rang da 5,3, *Karthikan Albert* da 5,2 ed *Erkan Dzeldjardini* da 5,1. *Laura Deplazes* ha contonschiu 5,0 els examens finals mercantils e *Julian Cajacob* ha medemamein terminau cun success igl emprendissadi sco mencanist da produziun. Dominic Huonder e Laura Deplazes vegnan a restar fideivels al'interpresa dalla tecnica da metal Distec SA, quei che legra l'entira interpresa. La Distec SA gratulescha per quei grond success e giavischa allas absolventas ed als absolvents bia plascher e success ell'occupaziun professionala futura. (cdm/fmr/hh)



Bien success pils emprendists dalla Distec SA als examens professionals finals.

FOTO DISTEC SA

FIASTA DA S. GIACHEN

Cun messa a Cuera ed excursiun

(cdm/gc) L'Uniun grischuna per la Via da s. Giachen arranscha dapli onns ina messa festiva sil di dalla fiasta da s. Giachen a Cuera. Liug ha quei survetsch divin uonn ils 25 da fenadur ella baselgia dil Salvader. Entschatta: allas 10.00 uras. Suent l'eucaristia datti ina excursiun – sut l'egida da *Heiner Nidecker*, plevon emeritau, Panaduz – tras il Fürstenwald ora a Termin e Zezras. Mintga onn, el qual la fiasta da sogn Giachen croda sin ina dumengia, ha liug a Santiago de Compostela in onn sogn en

honur da s. Giachen. La fossa da quei apiestel sesanfla leu en Spagna. Igl onn sogn en honur da s. Giachen vegn commemoraus dapli il 15. tschentaner. Aviarts vegn igl onn sogn da s. Giachen ils 31 da december digl onn precedent, pia 2020, e cuoza tochen la fin d'uonn, tras igl arzustg da Santiago cun spluntar treis gadas sin la porta sontga dalla catedrala. Per la fiasta da s. Giachen van pelegrins e pelegrinas mintgamai tras quella porta sontga ella catedrala per assister al survetsch divin festiv.

Mo ils purists volvan las caultschas.

Aforissems, Hendri Spescha



Sumvitg, Rabius e Trun – fotografà da l'Alp Nadels.

FOTO SUSI ROTHMUND